

欽定剿平粵匪方略

欽定勦平粵匪方略卷三百四 壬戌年

五月初一日壬午署江蘇巡撫李鴻章奏言疊奉

諭旨令臣移紮鎮江妥籌兼顧臣於三月初十日抵

滬續到兵勇共計五千餘人現尙有楚勇兩營

未至屢接督臣曾國藩來函以兵勇訓練未熟

目下斷不宜出仗臣親駐營盤督率操練未敢

稍懈十五日接受撫篆後卽派所部四千人進

紮南匯縣之周浦鎮分南北兩路相機攻剿如
浦東廳縣肅清當屯重兵於金山衛以堵浙省
踞賊東竄之路惟松滬水陸各軍紀律不明若
逐加淘汰更換將領束以楚軍規制必須數月
乃有眉目署臬司劉郇膏樸實廉正深得民心
現委辦臣軍營務藉資練習亦須數月後察看
能否接辦臣在上海未必卽有化弱爲強之效

臣往鎮江亦未必無一傅衆咻之虞但臣職分所在不敢畏難當遵

旨詳加簡閱悉心選汰如能將上海各軍整理就緒付託有人然後出江周歷北岸以達於鎮可無內顧之憂容臣隨時察度奏明辦理頃據喬松年稟報竄揚之賊已向西北撤退如果鎮揚再警臣卽酌撥水師數營於裏下河各口以固江

皇朝通志卷三十四
二
防若臣移紮鎮江則當會同都與河互相接應
合方掃蕩

同日馮子材魁玉奏冒北竄之賊經揚防官軍
屢次剿殺大半渡江南竄遁回九洲老巢北
岸業已肅清查此次逆賊北趨其意專注裏下
河一帶今既未能得志於北必將併力於南據
控丹陽句容賊黨日增密製旗幟號衣未知所

得臣等揣度賊情蓋知大兵漸集必由丹陽分道會攻故欲先發制人阻我進步現在西南雲臺寶蓋各山業已扼要紮營與金山甘露寺等處水陸聯絡當可有備無患查各路軍情嘉定克復揚防解嚴賊勢稍衰兵威漸振此實江南軍務一大轉機鎮防偏處賊巢該逆百計環攻屢經創敗正宜乘此機會督率三軍由馬陵諫

壁等處步步爲營分道大舉惟鎮城根本重地
一經進取尤須大軍留守始免牽掣而兵力止
有此數進戰退守兼顧爲難伏讀節次

諭旨飭令署撫臣李鴻章駐紮鎮江整頓各軍規復
各城將卒無不鼓舞近聞蘇省紳民有願請撫
臣留滬督師進剿蘇常之說或恐一時未卽成
行仰懇

天恩飭催該署撫臣酌量情形移緩就急卽日帶兵
來鎮通籌全局會商進取均奏入

上命議政王軍機大臣傳諭曾國藩李鴻章曰鎮江
爲南北關鍵現在北岸肅清急宜以重兵駐紮爲
進規江甯之計况廬郡克復陳逆授首曾國藩軍
威大振指日克復蕪太進攻金陵京口必有勁旅
會攻句容等處方可與曾貞幹等軍聲勢聯絡李

鴻章如能抽身赴鎮則呼應皆靈於大局較有神
益若兵勇未熟亦不妨俟行抵鎮城酌量妥辦其
上海兵勇亦可會商曾國藩派員前往整理似不
必因此勾留著曾國藩迅卽會商李鴻章酌量情
形通籌全局如可帶兵及早到鎮先占形勝最爲
得策

上又命議政王軍機大臣傳諭馮子材魁玉曰馮子

材等奏江南機有可乘請飭李鴻章駐紮鎮江爲規復各城之計所籌不爲無見惟李鴻章到滬未久兵勇尙須訓練且攻勦浦東正當喫緊已諭令曾國藩李鴻章體察情形如該署撫將滬上事宜料理就緒卽馳赴鎮城勦辦李鴻章未到以前馮子材等責無旁貸現在西南雲臺寶蓋各山業經該提督等扼要紮營與金山甘露寺等處聲勢聯

絡著卽督飭各營鎮將嚴密巡防如該逆由句容丹陽分股來撲務當激勵兵弁竭力守禦俟李鴻章抵鎮後厚集兵力再圖規復各城可期得手

李鴻章又奏言已革甯紹台道張景渠署甯波府知府林鈞由定海率領廣艇鄉勇於四月初八日攻復鎮海縣城十二日進攻甯波逆匪堅拒不退開礮抵禦外國兵船開放大礮轟入城

內遂用梯登城賊匪敗竄慈谿當將甯波府城克復臣令署藩司吳煦撥兵前往協守並緘商曾國藩左宗棠酌派文武大員由閩航海赴甯督辦防務奏入

上命議政王軍機大臣傳諭曾國藩李鴻章薛煥左宗棠曰上年甯波失陷傳聞逆匪旋即退竄僅有該郡紳士料理一切事宜此次官軍進攻甯郡逆

匪堅拒不退是否該逆退竄後復來郡城著左宗棠薛煥李鴻章等將詳細情形據實具奏甯波鎮海業經收復亟宜得人而理綏輯地方著曾國藩左宗棠迅卽遴派賢能員弁酌帶水陸官兵由閩航海前赴甯波郡城督辦防務

李鴻章又奏言官軍自克復嘉定後約會華爾及英法各軍直抵青浦縣城四月十四日官軍

環攻各門英法各兵並用大礮轟塌西南城牆
十餘丈卽由西門登城華爾督勇繼之羣賊驚
亂我軍一擁而上殺賊甚多餘逆奪門衝出中
外兵勇痛加截殺陣斬悍賊千餘名生擒三千
餘名救出被擄男婦三千餘人當將青浦縣城
克復其附近數十里賊蹤掃除淨盡現暫派常
勝軍在城駐守參將李恆嵩紮營兩岸以堵蘇

皇朝通志卷之三十一
州援賊副將銜華爾屢著戰功擬請以副將補
用其餘在事協勦員弁兵勇可否擇尤彙案請
獎青浦縣知縣廖秩璋上年失守城池本有應
得之罪此次帶團會勦隨同收復可否

加恩免其治罪仍帶革職處分留於本城效力之處
出自

皇上逾格鴻施奏入

上諭內閣曰青浦縣城克復已據薛煥奏到茲據李鴻章奏克復詳細情形此次英法兩國提督會同官軍克復縣城實屬誠悃可嘉著該署撫傳旨褒獎副將銜華爾著以副將補用青浦縣知縣廖秩璋失守城池本有應得之罪此次隨同克復縣城著加恩免其治罪仍帶革職處分留於本城效力其餘在事出力員弁著李鴻章擇尤保奏

初二日癸未托明阿瑛榮孔廣順張芾奏言粵逆

前偏省垣經兵團擊退後復由藍田東竄渭南
境內臣等會派兵勇馳赴渭南跟剿未能得手
而商州棣花鎮之賊分竄雒南山陽雒南城守
嚴緊賊卽解圍山陽縣城探已被陷此股賊匪
猖獗異常現雖飛調署陝安鎮總兵閻丕敏統
軍移向賊前扼其北竄然著名峪口共計七十

二處其餘溝岔紛歧實有防不勝防之勢現在
催趨豫楚兩省援兵杳無消息賊匪大股尙在
渭南若悉數東趨出潼關則豫界渡黃河則晉
界賊蹤飄忽在在可虞 臣等已飭潼關設法堵
剿一面飛飭楊飛熊星夜入關迎頭截擊復飭
茅津渡防河之員速赴蒲州沿河堵禦並飭蒲
州府知府李慶翱悉將黃河船隻撤歸北岸以

免竄越

同日鄭元善奏言臣前次具奏派兵馳赴大峪口堵剿粵逆仍留楊飛熊在豫追剿辜捻頃奉諭旨令臣飭楊飛熊一軍赴陝查前因追剿西路敗捻楊飛熊未能赴陝當將西安馬隊五百名飭原帶之圖克唐阿等拔隊回秦現在豫東匪蹤已遠陝疆正當喫緊自應先其所急當卽馳檄

楊飛熊趕緊折回並將派赴大峪口一軍均歸
統率飭由陝州前進會合秦晉兵勇探蹤攔截
以扼西北要隘

同日朱潮奏言陝西久爲賊所窺伺孝義鎮安
等處相繼失守逼近省垣岌岌可慮臣聞署陝
安鎮總兵閻丕敏候補道李祝齡帶兵三千四
百餘名辦理商雜防務擁兵自衛迨賊長驅入

鏡又復遷延不報輕棄要隘有心貽誤撫臣不
嚴察拏問僅請革職留任何以伸紀律而服人
心商州知州曹熙探知賊蹤所向不赴四道嶺
扼要防守乃安坐衙署不敢出城紳士等提出
書院公項呈請作爲練勇經費竟被曹熙之子
濫支侵用以致賊匪越險而過且聞曹熙於上
年謀回商州本任饋送瑛棨古玩等物值數千

金提督孔廣順督兵前赴商州援勦節節逗留
行至黑龍口卽駐紮不前商州再三告急置之
不理復輕聽謠言兵俱潰散賊愈深入署藩司
王承基歷任貪鄙此時軍情緊急毫無籌畫終
日吸食洋煙演唱崑曲復徇庇署鹽道韓泰華
於防堵局一切支發表裏爲奸撫臣亦不過問
伏思關中形勝之地賊所必爭該省平日並未

舉行團防寇將入境探報無人玩泄已極南山
延亙八百餘里匪類甚多如與賊匪勾連乘虛
而入燎原之勢實可隱憂合無請

旨簡派明幹大員督辦該省軍務責令剋期勦滅以
重地方其庸劣各員一併從嚴究辦按律懲治
均奏入

上命議政王軍機大臣傳諭瑛棨張芾曰御史朱潮

奏陝省情形並庸劣各員請從嚴究辦等語關中
險要林立如果守禦得人何難收一夫當關之效
乃平日則稱守備嚴密賊至則任令肆擾如入無
人之境又復徇庇劣員曲爲寬宥如此粉飾貽誤
該撫捫心自問何以克副委任耶至王承基韓秦
華兩員如果劣蹟昭著該撫近在同城何以毫無
覺察形同聳聳著瑛檠張芾按照所奏各情秉公

卷之三十一

七

確查嚴叅具奏不准稍有回護至孔廣順剿賊遲延實係兵勇不齊業經免其議處仍責令統帶兵勇將藍田竄匪迅速剿除以保完善山陽被陷已諭官文等催何紹彩由鄖陽前進飭多隆阿由皖入關楊飛熊一軍徑赴西安會剿各路援兵計日可到該撫等務當督飭兵勇激勵鄉團戰守兼資毋稍疏懈

上又命議政王軍機大臣傳諭鄭元善曰豫省閩鄉
盧氏一帶毗連秦中雒南等處該匪若由此北渡
則震擾及晉西趨則踰險入關該撫令楊飛熊扼
截西北要隘自係力籌屏蔽惟陝省逆匪自鎮安
孝義一帶竄入撲擾省城現復竄回藍田渭南交
界處所陝兵單薄防不勝防前據官文奏已飛飭
何紹彩一軍赴鄖陽相機進剿著鄭元善迅速探

明楚軍如已入陝楊飛熊一軍即可扼守西北以斷竄賊往來之路並隨時酌量情形相機防剿斷不可任令賊蹤關入晉省以期力保完善如楚軍尙未入陝則事機甚緊卽著仍遵前旨飭令楊飛熊星速入陝力圖截剿勿徒以扼要爲詞致同株守正寄諭間據托明阿等馳奏山陽被陷賊勢猖獗請飭催各路援兵星速入關等語著鄭元善嚴

催楊飛熊趕緊督帶所部迅赴西安會剿毋稍遲
誤

上又命議政王軍機大臣傳諭官文駱秉章多隆阿
曰前因陝省軍務喫緊疊諭官文等迅飭何紹彩
等前往攻剿並令於多隆阿舒保中酌派一員馳
赴陝省辦理本日據托明阿等奏稱山陽城池被
陷現飭閻丕敏帶兵扼其北竄而峪口太多防不

勝防請飭催楚豫援兵等語陝省兵力單弱將領
無人以致任賊四竄山陽與鄖陽連界若何紹彩
所部就近進剿最爲近便卽著官文等催令前往
毋許遲誤多隆阿克復廬郡自可移緩就急著酌
帶所部馳赴陝省督辦軍務總兵雷正綰現在營
中卽著帶同前往留皖兵勇卽咨李續宜統帶調
度

同日李鴻章奏言上海近日軍情經前撫臣薛
煥派知府李慶琛帶隊往攻太倉州進紮城東
板橋地方踞賊死守不出逆首李秀城調賊衆
十餘萬於四月十九日分援太倉抄襲李慶琛
各營後路該軍猝被攻陷傷亡甚多知府李慶
琛副將王國安梁安邦同知周士濂均無下落
二十日該逆連撲寶山縣城經參將姜德督勇

擊退嘉定青浦各防同時告警 臣已分派兵勇
前往協守如西路再警卽將派往浦東之湘淮
勇四千調回援剿奏入報

聞

初三日

甲申

官文嚴樹森奏言陝西形勢向稱奧

區自川賊竄入陽平關擾及沔縣豫賊竄入武
關蔓延商州外險已失日來情形若何尙未接

據確信昨准多隆阿咨稱虜州攻克後逆首陳
玉城奔竄壽州安知不糾合死黨爲筴而走險
之計揣度賊情實深隱慮陝西留營之兵未經
戎陣戰守兩無可恃鄂省兵勇連年苦戰尙知
步伐可以應變奈自皖省至襄樊布列千數百
里亦屬無可抽分查髮逆所最畏者惟多隆阿
一軍祇有就多隆阿所部抽撥赴陝以爲西陲

保障查有現任陝西陝安鎮總兵雷正綰隨多隆阿數年每戰必克其威望堪以獨當一而且陝安鎮總兵是其本缺若蒙

天恩飭赴陝西令率所部一營臣官文再於多隆阿部下另挑數營精銳交該鎮統帶入秦並懇

飭下陝甘督撫臣將該省綠營兵弁統歸該鎮揀調聲威旣壯西竄之賊自不敢深入爲寇矣所有

該鎮隨帶楚營自當竭力籌備口糧惟其數過多可否

飭下陝西撫臣量力飲助餉銀由閒道解楚俾該營裹糧有資愈作士氣

官文嚴樹森又奏言臣等前聞賊竄商州卽派總兵何紹彩統帶四營馳赴鄖陽相機援剿刻下計已起程新授陝西督糧道劉齊銜已飭令

身之身目ノ四ノ三ノ四
迅赴新任查孔廣順隨臣官文軍營數年知其
閱歷老成惟氣局拘謹調度未能變通此次入
陝之賊皆係著名悍寇孔廣順恐非其敵且年
已六旬精力漸減守隘籌防尙可得力摧鋒陷
陣難期裕如惟臨敵易將兵家所忌或俟雷正
綰抵陝後再令交替接辦總統其衆奏入

上命議政王軍機大臣傳諭官文嚴樹森曰昨諭官

文等飭多隆阿酌帶所部速赴陝省督辦軍務總
兵雷正綰卽著帶同前往本日官文等所奏與昨
寄諭旨實相吻合現在陝省軍情甚關緊要著官
文速飭多隆阿迅率所部馳赴陝省並將雷正綰
帶同前往留皖兵勇交李續宜管帶其何紹彩所
帶之軍已赴鄖陽仍著先行催令迅速入陝援剿
毋稍遷延該將軍等隨帶楚營口糧已諭瑛棨速

爲籌撥由間道解赴多隆阿軍營惟多隆阿等斷
不可因等候陝餉致誤遣行至孔廣順現在陝省
責令勦賊不得不將各軍歸其督率一俟多隆阿
等到陝卽將全軍歸其提調誠以臨敵易將不可
不慎此時仍當責令孔廣順等實力勦辦也多隆
阿等何日成行著官文等先行馳奏

上又命議政王軍機大臣傳諭英桂瑛榮曰晉省防

務喫緊前已有旨令英桂出省扼要駐紮前任雲
貴總督吳振械久歷封圻尙稱諳練此時如尙居
陝省卽著瑛瑛傳知該員令其馳赴晉省協同英
桂辦理防勦事務並著英桂於吳振械到晉後將
布置事宜妥行籌商以期周密昨因廬郡克復逆
首四眼狗就擒皖省兵力有餘可以移緩就急已
諭令多隆阿分帶楚軍馳援陝省並諭令總兵雷

正綰隨同赴陝惟楚營口糧積欠過多待餉孔殷
瑛稟務宜籌撥餉銀派委妥員由間道迅解多隆
阿軍營以利遄行該撫仍宜會同托明阿孔廣順
張芾等激勵兵勇鄉團隨時進剿力掃兇鋒毋得
專待援兵致誤事機

同日勝保奏言竄陝之匪爲粵逆僞扶王陳得
才向稱兇悍且所帶土工皆善挖地道意在攻

陷城池若不亟圖補救其患不可勝言現調鄖陽襄樊等處援兵能否趕到尙未可知楊飛熊一軍一時恐難到陝該逆已連陷廳縣西安腹背受敵若無大隊援兵剋期速至全局恐難挽回查多隆阿統帶楚師勤勞屢著今距壽州不遠若令星夜赴陝自必較有把握而沿江南下之兵有鮑超彭玉麟楊載福等衝其鋒有曾國

播李續宜等督其後兵力亦不爲不多斷不至
因此掣肘應請

飭下該將軍迅速遊行實於西北大局有裨臣現正
督飭官兵苗練進搆蒙辜捻巢勢不能遽撤全
軍若分兵前往亦屬無濟於事現擬以五月爲
期極力籌辦皖捻如果此間功成八九而陝賊
仍張臣當統率全軍馳往督辦卽以多隆阿爲

臣幫辦分擊合剿不患無成此時先其所急請
飭該將軍星夜帶兵速赴陝省實爲目前要著

勝保又奏冒接瑛棨來函告急囑臣早赴秦中

以殄寇氛臣現進剿捻巢正在得手之時若移

兵而西機會實覺可惜且臣一離皖疆苗練與

楚軍必致相左又成意外之虞不得已抽派兵

勇二千餘名卽日令副都統祥恩管帶前往半

纂正陽半駐壽城以資鎮撫近來楚軍所向有
功然爭功太甚成見太深非楚人不官非楚兵
不用未免互相標榜

聖明在上當必有以折中至當而不致有偏信之失
也現在廬郡已克曾國藩似宜督軍進抵和州
李續宜當進紮安慶以爲曾國藩後路聲援而
淮北一帶勦撫機宜臣不敢諉之於人而又不

可爲所牽制似應

另簡大員率領穎軍專司其事一切重大事件與臣
商推決裁則臣酌奪緩急卽暫離皖疆三兩月
仍可循照舊規不致使已成之局另生枝節查
賈臻才具本優地方情形尤爲熟悉若蒙

天恩卽命辦理長淮以北勦撫事務大臣仍歸臣營
一節制於馭苗勦捻當可相宜奏入

上命議政王軍機大臣傳諭勝保曰陝西軍情緊要該大臣所籌不爲無見昨已命多隆阿率同雷正綰等迅速援陝該大臣督飭官兵苗練進搆蒙臺老巢軍事正在喫緊若移軍而西恐捻勢再張愈難著手且苗沛霖練衆尤須鈐轄該大臣現旣駐師淮潁當以馭苗勦捻爲已任必須始終其事計出萬全方爲不負委任所請以賈臻辦理長淮以

北勦撫事務大臣著毋庸議所稱以五月爲期勦
撫兼施籌辦皖捻該大臣總當存受降如受敵之
心斷不可希圖了事率行收復仍貽後患至楚軍
頻年進勦所向有功李續宜雖有成見該大臣惟
當破除積習與之和衷辦理

初四日 乙酉 英桂奏冒據探逆匪先在陝西之尹

家集一帶盤踞因兵團堵截不敢偏省刻下已

分竄渭南華州漸近同州相距朝邑不遠居民紛紛奔避所在戒嚴晉省沿河州縣無不喫重且陝西三河口貨船甚多設被搶船北駛則蒲屬首當其衝實有防不勝防之勢目下河南股匪未淨晉省潞澤一帶緊接豫疆前派防兵勢難驟撤此外無兵可調惟遼平二州防務較鬆已將該二處防兵抽撥四百名派已革副將邵

鳳林管帶先往平陽府駐紮聽候調遣復在省
標挑選馬步精兵三百名派參將恩瑞管帶繼
進臣定於五月初四日親往蒲州一帶察看情
形相機籌辦至省防事宜適有前大理寺少卿
田雨公在省當與面商令其會同司道妥籌布
置前太僕寺少卿徐繼畬現在平遙縣前江蘇
巡撫趙德轍現在解州臣此次出省路經該處

自當與該紳士等面商勸辦團練以資捍衛並
咨陝西撫臣飛飭潼商道將三河口船隻全撤
北岸以免搶渡奏入報

聞

初六日

丁亥

袁甲三奏言江南援賊經提督李世

忠擊退後屬聚江邊各村莊希圖紮營再逞該
提督督調各軍乘勝追剿該逆排仗抗拒李世

忠親督馬隊奮勇直衝身入重地該逆層層包
裹李世忠手刃悍賊七人躍馬而出賊衆驚駭
各隊兵勇一擁而上短兵相接逆勢不支適提
督李顯發等各隊趕到四面包抄該逆無路可
逃李世忠豎立投誠免死大旗被脅之衆棄械
乞命者三千餘人餘賊驚惶南竄我軍追殺殲
斃二千餘名生擒九百餘名李世忠先期知會

江浦總兵李顯爵豫備截擊李顯爵以精騎設
伏於江浦東城地方攔路要截擒斬無算賊奔
江岸爭船搶渡撲河落水者尤多餘衆遁回九
洲老巢江北一律肅清現據該提督呈稱江
北惟九洲未復該處緊逼大江與金陵賊巢
對峙爲南北第一關鍵前因奏調水師不至以
致賊股北渡來往自由全局幾爲搖動今雖將

賊擊退若不設法攔截難保不去而復來爲今
之計欲保江北必先圖九洲欲圖九洲必
嚴扼江面以斷江南援賊等語現在上游水師
已至烏江若下游礮船上駛聯爲一氣則九洲
洲賊巢孤立無援不難掃除淨盡已飭李世忠
迅速相機進剿並咨商會國藩都興阿妥籌辦
理奏入

上命議政王軍機大臣傳諭曾國藩袁甲三都興阿
曰江南逆賊圖援北岸經李世忠督軍追殺賊匪
渡江南竄該提督現籌進攻九洑洲以固江北著
卽飭令進攻九洑洲與各將弁同膺懋賞前據曾
國藩奏稱飭黃翼升統帶水師赴鎮著飭該總兵
於抵九洑洲時先將賊巢攻克再行赴鎮其下游
礮船亦可酌量調撥上駛以期厚集兵力並著都

興阿督飭水陸各軍協同攻勦庶李世忠之兵不至獨衝兇鋒而要隘易於攻克該將軍務當和衷聯絡共奏膚公以慰塵念

同日沈兆霖奏言粵逆突入陝境連陷鎮安孝義兩廳縣西安副都統烏蘭都迎勦失利賊氛近徧省城萬分緊急亟宜調兵救援臣調甯夏鎮兵一千名延綏鎮兵五百名並咨署提臣馬

德昭無論行抵何處卽行折回涇州俟甯夏兵到立卽統帶起程會合延綏鎮兵星馳赴陝合勦奏入報

聞

同日河南學政景其濬奏言此次髮捻分股西竄其由寶豐汝州擾及洛陽者合圍十有一日旋卽西去旬日之間連陷宜陽永甯新安三邑

副將楊飛熊旣敗於白楊樹參將巴揚阿又挫於襄邨間任賊狡獪莫能抵禦其由宛南鎮平內鄉擾及商雒者肆意焚掠亦未聞出一旅相撓縱其西趨而莫之顧統計豫省兵勇合剛銳十營襄勝昌勝各五營勇額亦不爲少奈調度未合機宜零星割截各不相統其抽出之兵勢孤力薄未能成軍左支右吾其繼立見臣愚以

爲諸營各有統帶之員遇有檄調宜令各歸各營使其兵弁相習不宜各營抽撥四分五裂以自弱也夫所謂守者當擇要衝之地爲犄角之謀查滎陽迤西溝路窄狹山勢巉巖又有黑石虎牢老犍坡可恃賊志斷不敢逞其南則襄城地當孔道北接新鄭西連禹郊駐兵於此可扼竄洛之路裕葉間之保安驛與寶豐舞陽北舞

波毗連駐兵於此可扼竄宛之路東作宛邱淮
蔡之後勁西爲邾鄆宛洛之屏藩一有緩急聲
息相通南北大勢不至隔絕而潼關武關皆成
腹地以守爲戰以逸待勞地勢莫利於此至豫
省地勢南跨鄂渚西帶秦晉鄰省防兵守門戶
莫如守藩籬應請

旨飭下山西茅津渡防兵進紮孟津口以爲洛陽後

援陝西潼關防兵進紮陝州之硤石驛雁嶺關
一帶爲峭澗後援鄂省防禦樊之十營移紮新
野接應宛郡防隨州之八營移紮武勝關接應
信陽脣齒相依互爲聲援庶可收用兵之效於
萬一奏入

上命議政王軍機大臣傳諭鄭元善曰楊飛熊等於
白楊樹等處敗挫鄭元善何以並未奏報當此賊

氛肆擾一切勝敗必應據實直陳豈可稍有隱飾
至豫省兵勇剛銳等營各有統帶之員自應令其
自爲統率以收指臂之效若各營分裂抽撥勢難
整齊完密該撫遇有檄調務當令其各歸各營使
其兵弁相習不致左支右吾以資得力滎陽迤西
有黑石虎牢等險一恃南則襄城可扼竄洛之路
保安驛可扼竄宛之路該撫自當相度大勢擇要

嚴防其山西之茅津渡陝西之潼關鄂省之襄樊
等各防兵應行駐紮處所著鄭元善會商各該省
督撫通籌大局布置妥協務令一氣聯絡互爲聲
援以臻嚴密

欽定勦平粵匪方略卷三百五 壬戌年

五月初七日 戊子 慶端奏言處州府屬之遂昌縣

前經民團克復因該邑無城可守松陽龍游江山各路逆匪分股麕聚復竄至遂昌縣治及潘村地方另股賊匪竄徧王村口經總兵林文察調派兵勇民團與署臬司張銓慶一軍合力夾擊將潘村賊營一律燒燬參將林文明等乘勝

進攻直抵遂昌縣治破柵而入斃賊數千該匪
由松陽一帶竄逃千總賴安邦等馳抵王村口
分路攻剿斃賊甚多張銓慶等率勇踵至賊匪
遁回松陽老巢遂昌全境肅清張銓慶等復帶
隊進剿松陽直薄三查口賊寨槍斃長髮老賊
多名副將曾元福等揮軍衝下當將此股撲滅
其龍游松陽等處下竄之賊由處州樂清竄至

温州之韓埠瞿溪並分股圖犯瑞安總兵秦如
虎等分飭水陸各軍馳赴瞿溪迎擊殲斃悍逆
多名賊衆復由瞿溪撲犯郡城秦如虎等督軍
擊退追斬八十餘名已革道員張啟煊率部進
紮瑞安之河頭地方查探賊匪踞於潘橋四月
初四日張啟煊派隊進剿攻破賊壘斃匪百餘
名初六日該逆率衆二萬餘人回向潘橋與任

橋之賊同時竄出我軍力戰四時殺賊數百該
逆始行敗退現在遂昌已無賊蹤惟松陽龍游
均有巨股逆匪兩面牽掣臣已飭林文察乘勝
進攻並飭曾元福等相機策應至温州一郡爲
閩省北路藩籬秦如虎張啟煊兵力尙單遊擊
李朝安所募臺勇一千五百名到省臣已飭令
馳赴瑞安歸張啟煊統帶復由營抽調兵勇疾

趨福甯交道員曾憲德調遣援應再由閩安抽
派師船飛駛赴溫會合陸軍分路痛剿現准廣
東撫臣耆齡咨會奉

旨來閩辦理援浙軍務臣惟有嚴督各軍奮力戰守
斷不敢稍任株守遷延貽誤奏入

上命議政王軍機大臣傳諭慶端左宗棠曰松陽各
路逆匪復竄遂昌經總兵林文察調兵撲滅遂昌

全境肅清其竄犯溫州之賊雖經秦如虎等迎擊
獲勝惟溫郡賊衆兵單防勦甚形喫重慶端現將
李朝安所募臺勇調赴瑞安並抽調兵勇疾趨福
甯抽派師船赴溫會勦著卽迅飭前往毋稍遲誤
此時賊勢趨重溫郡閩省東北防務緊要該督身
任兼圻責無旁貸務將溫郡及福甯一帶嚴密布
置不得因耆齡帶兵赴閩援勦意存誘卸松陽龍

游均有巨股逆匪左宗棠正宜乘此機會督兵馳往痛加剿洗爲牽制溫匪竄閩之計林文察秦如虎皆勇敢善戰並著慶端妥爲調遣加以激勵飭令會兵夾攻以期一鼓殲除

初八日己丑官文曾國藩多隆阿奏言官軍克復

廬州後逆匪向壽州一路逃竄四月十五日臣

多隆阿令溫德勒克西穆圖善等率馬隊官兵

過河向吳山廟一路跟蹤追勦過吳山廟二十里趕及賊隊追殺三十餘里至雙廟集賊列隊抗拒舒亮等率隊三路直前該逆死拒不退鏖戰二時之久溫德勒克西等奮呼直上槍箭齊施逆衆紛紛敗潰十六日官兵齊至瓦埠集復追殺二十餘里至余家埠該逆排列馬步各隊拚命衝突溫德勒克西等率隊齊進賊衆由莊

墓橋逃遁舒亮等飛騎攔頭截殺該逆無路可
竄撲河溺斃者約二千名生擒二百餘名馬隊
復追勦三十餘里至朱家集沿途約斃賊三千
餘名生擒六百餘名內穿黃衣賊三十餘名奪
獲羸馬槍械無算其吳山廟敗匪亦經雷正綰
等分途搜殺殲除淨盡查四眼狗陳玉城自被
我軍攻克堅城該逆率餘黨二萬奪路逃竄經

官軍連日追殺共斃賊匪一萬七八千名內黃
衣賊目五十餘名生擒一千三四百名逆勢已
孤不難指日授首所有戰功卓著之

記名副都統佐領常星阿等籲懇

天恩給予獎敘

同日英桂奏言臣於五月初五日行抵平遙縣
接據護太原鎮臣和昌等稟報逆匪竄陷陝西

渭南縣由華州華陰直徧潼關勢甚猖獗加以
回匪勾結焚搶與漢民互鬪成仇晉省僅隔一
河情形萬緊臣卽飛飭和昌等督率在防文武
激勵勇團加意防守一面督兵前進所慮陝省
回民甚衆慄悍性成若不急爲解散爲患何所
底止應請

旨飭催撥兵星夜馳赴勦辦以資得力均奏入

上命議政王軍機大臣傳諭官文多隆阿曰陳逆竄
入壽城前據勝保奏經苗練擒獻已諭令在軍前
正法諒已遵旨辦理前諭多隆阿率所部馳援陝
西雷正綰赴陝安鎮本任督辦防勦現在陝匪竄
陷渭南由華州華陰直逼潼關勢甚猖獗多隆阿
著卽趕緊拔營率同雷正綰赴陝多隆阿部將如
楊朝林趙旣發余福象並著酌量帶往以資調遣

現在賊勢趨重潼關山西蒲州一帶尤爲喫重並
著多隆阿選派一軍由蒲絳繞赴潼關扼守毋令
該匪肆行竄擾總兵何紹彩仍著官文催令迅赴
陝西何路最緊卽由何路勦辦毋得遷延觀望致
誤事機

上又命議政王軍機大臣傳諭瑛棨英桂鄭元善孔
廣順張芾曰前據瑛棨等奏賊匪竄至藍田渭南

交界當經諭令該撫等扼要堵剿瞬將旬日未據
陝省續報軍情茲據英桂奏逆匪竄陷渭南由華
陰直逼潼關勢甚猖獗加以回匪勾結焚搶與漢
民互鬪成仇等語渭南地屬膏腴何以毫無備豫
賊到卽行淪陷孔廣順現在何處曾否接仗渭南
華州一帶兵團有無守備何至任賊長驅該處回
民尤衆當此賊氛肆擾如果回漢互相仇怨使賊

隨處勾結助其兇燄辦理更形棘手著瑛榮張芾
飭屬整齊團練釋其私怨自相保衛並責成哈連
陞設法將該回民激勵籠絡俾爲我用孔廣順督
軍勦賊務令兵勇奮力直前如能挫賊兇鋒卽奸
宄潛藏自不至爲所煽動晉省僅隔一河蒲州等
處尤爲喫重英桂現已出省著卽擇要駐紮督率
防兵與陝省會同扼河固守毋令一賊偷越前奏

黃河船隻均已提歸北岸此時尤應嚴密巡查毋
稍疏懈楊飛熊一軍著鄭元善卽遵前旨飛飭星
速前往探知陝省何處緊急卽由何路援應瑛棨
英桂等仍當就現有兵力乘賊初至實力堵剿毋
得坐待援兵任賊蔓延自干罪戾晉省團練卽由
徐繼畬等實力舉辦並著英桂飭令各地方官互
相聯絡協同防剿陝省鄉團張芾責無旁貸其回

民標悍應如何聯絡借助著卽趕緊妥籌辦理

上諭內閣曰廬州逆匪向壽州一路逃竄經多隆阿
派溫德勒克西等帶隊追勦殺賊二萬七八千名
廬州悍逆殲斬殆盡辦理甚屬得手所有戰功尤
著之記名副都統佐領常星阿著交軍機處記名
遇有副都統缺出提奏儘先協領雙福富平阿西
們克西克均著以副都統記名簡放記名副都統

和善著賞給圖桑阿巴圖魯名號儘先副將徐鷓
著以總兵記名簡放記名道員馬新貽著賞加按
察使銜以示獎勵其餘出力員弁兵勇著官文等
查明歸入攻克廬州案內奏請獎敘

同日沈葆楨奏言臣於四月初四日行抵廣信
府城探聞近日皖北各軍連克巢縣含山和州
等處皖南各軍連克繁昌青陽石埭太平等處

該逆無地藏身屬聚江浙勢窮必竄而廣信獨當其衝現在侍逆李侍賢雖經左宗棠痛剿宵遁然信郡久爲該逆垂涎宜爲未雨綢繆之計惟江省瘡痍未復兵勇團練均無可恃臣再四思維惟有堅壁清野可以輔兵力之不足然恐民力未逮創始爲難查信郡士民間警輒徙徙則必擇其地之山深徑窄天險可憑者第能擇

而不能守則我能往寇亦能往受害轉多臣現
曉諭士民如所居鄉里本有險可憑者卽於村
口築寨以資固守其無險可憑者卽於向來就
近避亂之所通力合作憑險築寨猶慮士民觀
望不前臣已捐廉千金以爲之倡飭令該地方
官會督委員紳士周悉履勘擇要興修勿任畏
難苟安以仰副

聖主綏靖巖疆有備無患之至意奏入

上命議政王軍機大臣傳諭沈葆楨曰江西廣信一
郡毗連浙閩爲左宗棠入浙各軍後路該逆屢圖
竄擾以阻進剿之師現在皖南北諸軍連克堅城
左宗棠復肅清江常進攻開化該逆被剿窮蹙難
保不由浙閩之交回竄信郡以圖牽掣我師沈葆
楨現已行抵該郡著卽將修寨築堡各事宜妥爲

布置並責令地方官及委員紳士等擇要興修務期有險可恃衆志成城使賊入境無可擄掠則賊勢益孤賊糧易匱而官軍復分路要擊以收坐困之效惟堅壁清野之法在川陝著有成效江省地勢民情各異尤當因地制宜變通盡善使民不擾其地方官及派出之委員等務須擇其決治民心之員與該郡紳民妥爲辦理毋致藉端擾民廣信

爲該撫舊治一切地利民情知之必悉諒能斟酌
盡善以慰廑念

初十日 辛卯 左宗棠奏言逆首李侍賢於江山花

園港敗遁後 臣軍追至常山該逆已由衢南回
竄龍游今賊黨堅踞龍游縣城及衢南之石室
街並喉壽昌踞逆分竄衢州東北一帶修築堅
壘以抗追師而自率諸賊回竄金華府城老巢

其另股由塘溪口繞竄遂昌龍泉邊界者經官
兵鄉團及總兵林文察截擊斃賊二千餘名餘
匪由松陽遁走遂昌龍泉兩縣肅清賊之大勢
均趨重金華而倚龍游壽昌蘭谿三縣賊巢爲
犄角之勢臣本擬先勦衢北之賊以攻龍游因
接道員王文瑞等飛報首逆僞輔王楊輔青率
大股分由瀉安縣之威坪梓潼源港口而來圖

撲遂安以擾江西而皖南自鮑超等連戰克捷收復城池後各處敗匪亦由甯國竄至前隊已抵遂安之界首東亭一帶賊館連紮四五十里臣以李侍賢甫經敗遁勢必不敢上竄楊輔青一股久圖越竄江皖遂安防兵單薄開遂一帶歧徑最多分駐馬金街之四營亦難徧行扼截遂令知府劉典率各營由華埠馬金以抵昏口

臣率親兵及各營由常山進駐開化相機堵剿首逆楊輔青聞官軍大至乘夜遁逃王文瑞等派隊追剿沿途僅殺斃長髮老賊百數十人追至淳安縣城賊已奔竄昌化復向甯國竄去臣已咨皖南各軍嚴行戒備李逆之黨踞壽昌龍游者見臣軍已赴開遂一路日漸上竄衢郡南北又形喫緊臣卽由華埠出常山赴衢州劉典

崔大光等營已陸續拔回俟玉山婺源德興各處購米解到卽裹糧而趨相機辦理奏入

上命議政王軍機大臣傳諭左宗棠曰逆匪麕聚浙東圖竄江閩蓄志日久衢郡爲江閩門戶左宗棠自應親往督勦以扼要區惟該撫所部本單而賊計詭譎堵此竄彼殊形勞苦蔣益澧劉培元所部已報起程該撫卽派員迎提以厚兵力現在鮑超

進攻甯國指日必可得手敗匪上竄亦在意中該撫前擬由嚴規杭賊勢浩大難期得力若俟蔣益澧等軍分道並進始無掣肘之虞該撫於擊退竄衢逆賊後酌量情形相機辦理斷不可輕率前進江西防兵無多沈葆楨尙能布置惟閩省之兵多不得力該撫仍當與慶端耆齡會商戰守機宜庶免賊匪乘虛抄襲

同日耆齡奏冒 臣奉

旨馳赴福建辦理援浙軍務隨飭飛虎等營壯勇四
千名並添募香山揭陽兩縣老勇一千餘名均
歸知府康國器統帶並飭司道庫設法籌措餉
銀二十萬兩於四月十五日次第拔營前進 臣
亦卽起程取道江西徑趨建甯昨據探報浙江
逆匪竄撲江山縣峽口地方福建派防之師先

勝後挫賊遂闖入江西廣豐縣境經左宗棠派
兵與江軍會剿萬一此股逆匪爲江浙官兵所
偏旁竄閩疆擬卽改由建昌至邵武迎頭截擊
其溫州一郡自樂清失陷逆匪擄船數百號分
水陸兩路圍攻郡城軍情喫緊須由福建分撥
舟師駛往援應查五虎門海口派防水師船隻
本屬無多一經分撥益形單薄臣現雇募紅單

船十隻購買洋礮八十六尊選募水勇分別配
駕飭令都司關鎮國押帶前赴五虎海口統歸
總兵曾玉明調度至臣此次赴閩必須幹員差
遣查有前任江西饒州府知府鄧廷枏等辦事
奮勉仰懇

天恩俯准一併帶赴軍營差委俾收指臂之效

同日掌廣東道監察御史華祝三奏言現在江

北肅清賊勢漸蹙金陵首逆不能渡江而北勢
必循浙而南不擾江西必竄福建兩省情形同
爲喫重亟宜厚集兵力豫作準備臣聞閩省之
漳州勇泉州勇頗多驍健現俱效力行閒若令
耆齡認真挑選會同徐宗幹遴派賢能紳士管
帶必能聯絡鄉團協助官軍自固門戶江省本
有土練近因餉乏遣散殆盡月前撫臣出省防

勦所部僅三百人設有疏虞則斷左宗棠之糧道絕曾國藩之餉源全局必爲掣動且江省咸豐四五年閒賊竄義甯武甯鄉兵抵禦累戰皆捷南康縣田勇越境勦賊連解南韶之圍信豐興國樂平鉛山貴溪廣豐各縣鄉民均助官軍殺賊上年賊犯萬載亦被鄉兵擊退其中不乏謀勇兼備之士忠義敢死之民特無人鼓舞激

勸故不克竟其用撫臣沈葆楨在江有年熟悉
地方情事請

旨飭下該撫酌留地丁釐金銀兩訪求勇敢廉正紳
民令其各赴鄉閭號召義勇但得七八千人歸
撫臣訓練成軍必能因地制宜協助防兵同捍
外侮均奏入

上命議政王軍機大臣傳諭耆齡曰福建爲江浙上

游逆賊時圖竄犯雖經左宗棠等軍擊退而現在趨重溫郡該處爲閩省北路藩籬頗形喫緊且自江北肅清南陵等處克復賊計必圖南竄者齡所擬由建昌以至邵武距賊尙遠總須進至閩浙交界扼要駐紮旣可顧閩兼可援浙現在壽昌龍游之賊上竄衢郡左宗棠督軍由常山進剿惟望該撫及早趕到與左宗棠之軍互爲聲援軍情旦夕

變遷當隨時偵探賊蹤趨重之處迎頭截擊斷不
可避賊而行意存畏葸粵勇雖打仗勇往而屢次
滋事前諭該撫酌量情形不必多帶客兵以免後
患本日據御史華祝三奏請飭募閩省土兵復諭
該撫等斟酌辦理儻能經理得宜合以慶端所募
臺勇兵力已不爲單該撫所帶粵勇五千名或可
量減或於抵閩後分別遣散著卽據實具奏經過

地方如訪有擾累情事必將該撫從嚴懲處該撫
於接奉諭旨後遷延至今尙無起程定期實屬遲
誤可恨著傳旨嚴行申飭並著星夜兼程前進毋
許延緩至閩省與江浙唇齒相依必須通籌兼顧
沈葆楨籍隸福建於地勢軍情自能深悉曾國藩
前在江閩交界辦理防剿左宗棠相距不遠該撫
務當虛衷咨商聯絡一氣庶賊分我合無隙可乘

知府鄧廷柎等均著准其帶赴軍營差委如不得
力卽行撤回毋稍回護

上又命議政王軍機大臣傳諭曾國藩慶端耆齡沈
葆楨徐宗幹曰江北郡縣疊經官軍收復江南之
師進徧甯國蕪湖等處該逆被勦情急勢必鋌而
走險江西福建兩省自應豫籌備禦杜賊匪旁竄
之路沈葆楨在江有年熟悉地方情事該省何縣

鄉兵最爲得力其紳士中有謀勇兼備者卽著該撫實力訪求勸令招集勇敢鄉民數千人統歸該撫訓練俾成勁旅以備緩急之用所需餉項並著會同曾國藩妥籌酌撥前據沈葆楨奏馳赴廣信籌辦修寨築堡以資守禦若再得一二枝得力鄉兵分投援剿則呼應較靈於該省防務更有裨益其漳泉等勇現經慶端等調赴各處剿賊如尙不

集之身圖之冊之三十三
二
敷分勦著慶端耆齡徐宗幹會商妥辦認真挑選
並遴派該省知兵紳士分別管帶協同官軍嚴密
防守

十一日壬辰托明阿瑛檄孔廣順張芾奏言粵逆

竄入渭南境內經團練殺斃多名賊匪旋用大
隊壓下團勇不支逆衆遂由良田坡直撲縣城
知縣曹士鶴竭力抵禦賊屯東西南三關兵勇

不能前進於四月二十四日縣城被陷曹士鶴
力竭捐軀臨潼縣知縣繆樹本聞警督團扼其
西竄二十五日該逆分股出撲黃家屯官兵營
壘經帶勇官陳茂經等奮力擊退次日該逆復
悉數來攻兵勇更番疊擊賊匪層層密裏陳茂
經等先後中礮殞命賊匪卽於是日竄至華州
之赤水鎮該州知州濮垚帶勇馳往堵遏因賊

衆兵單抵拒不住賊遂闖入州城濮垚帶團追
勦當將州城克復賊匪東竄越過華陰卽在華
陰廟紮營該處離潼關不及四十里北渡渭河
則同郡朝邑先受其害南入山峪則商維又復
危急且潼關爲全省咽喉勢尤扼要臣等先將
河南撤回馬隊二百餘名截留潼關協同哈連
陞守禦復札潼商道蔣徵陶將潼關迤東防兵

飛調助守渭南河以北則自涇陽高陵富平臨
潼渭南蒲城大荔朝邑悉將渡船撤盡並飭地
方官激勵民團沿河列戍四五百里勢頗聯絡
近又派富平縣知縣江開循渭而東節節布置
同州一帶本可無慮近忽有回民聚衆乘機啟
釁肆行焚掠起自同州西至華州渭南同時震
動誠恐賊匪乘虛而入當卽趕派漢回官紳分

投馳往安撫解散至山陽縣城失陷賊股尙踞
城內四出擄掠急須剷除惟現在無兵可調臣
孔廣順大營兵勇祇有一千餘名不得已將前
駐商南閩丕敏之兵移紮藍田縣屬秦嶺等處
扼其北竄並咨護南陽鎮總兵徐榮柱令速進
兵駐紮商州之劉嶺統俟援兵到陝兩面夾擊
豫楚援兵經臣等疊次飛催尙無入關消息本

省兵勇非不效力戎行無奈以少擊多死亡相繼現惟有激勵民團同心禦侮合無籲懇

天恩再催勝保所派援兵及各省調派官兵星馳赴陝以期迅殄賊氛奠安三輔

托明阿瑛榮孔廣順又奏言此次竄擾省城之賊號稱數萬山陽踞匪數亦不少現在兵力極單官兵四次接仗傷亡甚多似須保衛省垣統

俟厚集兵力再行出戰西同兩府所屬渭北河
岸賴鄉團沿河固守賊匪未能偷渡至省城官
兵民勇晝夜守禦尙能衆志成城惟楊飛熊何
紹彩金國琛均無來陝消息現據探報鄖西亦
有賊匪竄擾金國琛一軍應請

飭下官文令駐紮鄖西一帶堵剿何紹彩一軍仍從
荆子關入陝繞出賊北由商州前進兩路夾擊

以免鄆西之賊歸併山陽合力北竄徐榮柱已
至商南之新廟正在迎催令其在商州之劉嶺
駐紮以扼山陽之南兼顧商州並防商南賊匪
回竄惟此軍卽到兵力亦單尙難夾擊沿黃一
帶英桂已派兵勇堵禦至三河口船隻蔣徵陶
已盡數提歸北岸風陵渡停泊臣瑛榮亦徑飭
蒲州府嚴加稽察奏入

上命議政王軍機大臣傳諭官文嚴樹森沈兆霖多
隆阿托明阿瑛梁孔廣順張芾英桂鄭元善曰賊
匪疊陷渭南華州兩城現竄至華陰廟距潼關甚
近托明阿等將河南撤回馬隊截留該處並將潼
關以東防兵調赴關門助守卽著飭令在防文武
固守待援毋令賊匪竄踞渭河以北各州縣已將
渡船撤盡民團沿河列戍勢頗聯絡惟同州一帶

回民現復聚衆乘機焚掠自同郡至華州渭南一帶均已震動著瑛槩張芾卽飭現派之漢回官紳速行馳往曉諭解散令其立功自贖儘始終抗違卽督飭鄉團將起事焚掠之回匪嚴拏懲辦以免賊匪勾結其安分良回卽著瑛槩等妥爲聯絡以資守禦並著激勵渭北鄉團嚴密扼守毋令賊蹤竄渡潼關一帶距茅津渡不遠英桂已赴蒲州著

卽飭令該處文武嚴密防堵並將蒲絳以上黃河
東岸扼要處所分布兵團合力防守三河口船隻
已盡提歸北岸風陵渡該處係蒲州所轄英桂務
當督飭地方官不分畛域嚴密稽查不許船戶私
行放渡儘有疏虞惟該撫是問楊飛熊一軍鄭元
善迅飭由洛陽一帶馳赴潼關迎擊山陽股匪屯
聚萬餘難保不北竄平原與華陽一股合併孔廣

順兵勇較單現已將商南閻丕敏之兵移紮藍田縣之秦嶺等處著卽相度機宜嚴加布置徐榮柱已赴商南著鄭元善迅飭進兵駐紮商州之劉嶺與陝省兵勇夾擊毋稍遲緩鄖西一帶亦有賊蹤著官文飭令金國琛駐紮該處堵剿何紹彩一軍卽飭迅由荆子關繞出賊前兩路夾擊使鄖西之賊不至併歸山陽並著多隆阿率同雷正綰星速

馳赴潼關一帶迎頭截擊南山商雒山陽鎮安等處兵力甚單沈兆霖所派甘兵一千五百名卽飭馬德昭管帶由漢中一帶馳往視賊所向相機截擊

托明阿瑛榮又奏言此次賊匪竄入渭南縣境該縣知縣候補直隸州知州曹士鶴尙在良田坡一帶激勵團練聞警回城守禦速縣城已陷

該縣猶執刀殺賊傷斃數人卒以力竭被戕其妻萬氏亦在署內罵賊被殺仰懇

天恩准照直隸州知州例從優議卹並於服官地方建立專祠其妻萬氏一併附祀又六品軍功縣丞職銜陳茂經在黃家屯與賊接仗殺賊數百卒以衆寡不敵爲賊所害軍功張龍驤張新緒安定邦把總張天祿外委李玉林同時殞命應

請一併從優議卹奏入

上諭內閣曰粵匪前徧陝西省城經官軍擊敗後東竄渭南該縣知縣曹士鶴登陴守禦因賊衆兵單縣城失守曹士鶴手刃數賊力竭捐軀其妻萬氏罵賊殉節縣丞銜陳茂經管帶練勇與黃家屯之賊接仗殺斃數百名亦以衆寡不敵被害軍功張龍驥等同時戰歿均堪憫惻候補直隸州知州渭

南縣知縣曹士鶴著照直隸州知州例從優議卹
並於死事地方建立專祠其妻萬氏著照例旌表
一併附祀縣丞銜陳茂經著照通判例從優議卹
軍功張龍驤著照千總例從優議卹張新緒安定
邦均著照把總例議卹把總張天祿外委李玉林
均著交部從優議卹

同日慶端奏言賊匪由台州處州分路上竄經

總兵秦如虎等迎勦獲勝 臣以瑞安僅張啟焯
一軍兵力過單四月初八日賊衆數千分路直
撲溫郡秦如虎督隊奮擊斃賊多名賊卽退回
把總姜玉麟邱廷標力戰陣亡十二日該逆分
股同時撲犯張啟焯督軍力禦相持四時賊衆
愈聚愈多遊擊賴得福中礮陣亡營盤被陷張
啟焯回守瑞安十三日賊匪馬隊竄僣瑞安城

下署知縣黃宗貴督率兵民開礮擊退旋有大
股四面圍攻其溫州城外二十里徧紮賊營文
武固守待援平陽與瑞安僅隔一江瞬息可渡
溫州餉道阻梗城內糧缺正恐日久難支遊擊
李朝安一軍已由省起程前由臣營調援兵勇
亦催令星夜前進惟兵力尙單復將曾元福所
部抽出臺勇一千三百名交遊擊白瑛管帶聞

道馳往總兵曾玉明先因彰化會匪滋事調赴
臺灣現在賴得福陣亡其所部臺勇非曾玉明
不能整集自應暫留曾玉明統帶各軍赴溫接
勦並飭守備邱光立率所募永春壯勇六百名
前往策應查逆氛逼近福鼎意在窺犯閩疆亟
應嚴行戒備已調福甯鎮標兵丁馳赴福鼎聽
候道員曾憲德調遣臣駐紮浦城惟有隨時咨

商撫臣徐宗幹相機調度遊擊賴得福把總姜玉麟邱廷標血戰捐軀應懇

恩飭部從優議卹

同日福建巡撫徐宗幹奏言浙江青田樂清兩路賊匪由甌江竄撲溫郡復糾集台衢各路逆匪分路抄襲並圖繞竄瑞安平陽二縣查閩省西北兩路均與浙境毗連該逆多由處州一路

竄近溫州瑞安窺伺閩疆北路情形極爲喫重
秦如虎張啟煊所部僅數千人兵力甚單本省
營兵已無可調李朝安續募臺勇一千七百名
到省臣卽飭令星夜趕赴福甯相機前進並催
令副將吳鴻源臣督全幫師船由瑞安平陽駛
赴溫州以資策應一面函商督臣慶端於行營
抽撥兵勇前往援剿昨准廣東撫臣耆齡來咨

由粵統帶勁旅五千名取道江西馳赴浦城亟
須分軍兼顧溫處庶可以挽危局均奏入

上命議政王軍機大臣傳諭慶端徐宗幹耆齡左宗
棠曰浙江逆匪竄撲溫郡糾黨分路抄襲圖擾瑞
安平陽二縣叅革道員張啟煊戰敗兵勇多有傷
亡溫州瑞安均已被圍徐宗幹已派李朝安馳赴
福甯相機前進並催令吳鴻源督帶師船駛赴溫

州策應著慶端趕緊催提以資戰守仍飭温州瑞安城內文武固守待援毋稍疏懈曾玉明卽飭令帶兵馳援温州福甯距省不遠設有疏虞關繫閩省全局慶端已調福甯鎮標兵丁馳赴福鼎聽候曾憲德調遣著徐宗幹就近調度以固根本耆齡由粵赴閩刻下應已趕到昨諭於閩浙交界駐紮著俟抵浦城後與慶端籌商或分軍兼顧溫處總

須視賊所向力籌堵剿昨據左宗棠奏壽昌龍游
之賊復竄衢郡該撫擬親往督剿自爲力固江閩
門戶起見惟溫州十分喫重該撫亦應妥籌兼顧
著卽與慶端等會商調度無稍疏失蔣益澧劉培
元所部已抵何處仍卽飛催前進以厚兵力

上諭內閣曰浙省逆匪由台處上撲溫州府城經慶
端派總兵秦如虎督兵迎剿斃賊多名把總姜玉

麟邱廷標力戰殞命遊擊賴得福中礮陣亡賊復
竄撲瑞安縣城經署知縣黃宗貴督率兵民開礮
擊退著慶端會同徐宗幹迅飭秦如虎等帶兵進
剿務將此股賊匪悉數殲除毋令竄入閩疆遊擊
賴得福把總姜玉麟邱廷標血戰捐軀深堪憫惻
均著交部從優議卹

同日左宗棠奏言遵

旨審訊王履謙貽誤情形查紹郡紳民因捐輸頻數
意存慳鄙又以兵勇擾民而不能殺賊遂謂用
兵不如用團併爲一談牢不可破王履謙咨前
撫臣調兵助防紹郡原無不願設防之心紹郡
紳民因廖宗元所調管帶礮船之何柄謙敗陷
賊中遂疑退回礮船通賊殺斃廖宗元親兵並
傷廖宗元頭額比時王履謙出城勸解亦實無

從旁袖手之事瑞昌等原奏得之一時傳聞自
難據以定讞惟王履謙以在籍三品大員奉

旨幫辦團練事前既不能與地方文武和衷商榷共
圖保衛之方事後復不能與同里士民竭力綢
繆共思恢復之策雖訊無棄城先遁情事而蒼
黃出走忍恥偷生復藉王有齡所調礮船通賊
及廖宗元調處不善飾詞瀆陳希圖誘罪律以

謀人軍師敗則死之之義卽請

旨立正典刑亦屬情浮於罪但該革員究係本籍幫
辦團練之紳與地方官吏及帶兵文武有閒律
無治罪專條且該革員賦性迂憨貽誤各情多
由受人指嗾所致可否將該革員發往新疆效
力贖罪之處伏候

聖裁至署紹興府知府廖宗元以力籌防守嚴催富

戶捐輸致紳富張存浩等誣其所調礮船通賊
殺斃該故員親兵並傷該故員頭額旋帶兵勇
守城禦賊捐軀應請

旨照知府例從優議卹並建祠紹興府城以昭獎勵
其紹紳四品封職張存浩等挾忿懷私將衆妄
殺罪不容誅應俟收復紹興府城後嚴拏到案
盡法懲治奏入

上諭內閣曰王履謙以在籍幫辦團練大員雖無棄
城先遁情事惟事前既不能與地方文武和衷布
置事後復蒼黃遠遁藉口礙船通賊及廖宗元調
處不善等詞希圖諉罪於人左宗棠所稱卽予立
正典刑亦屬咎有應得持論亦尙平允惟念該革
員究係本籍紳士辦理團練之員與地方官吏職
司守土者尙屬有閒王履謙著卽照擬發往新疆

效力贖罪以爲胎誤取巧者戒其署紹興府知府
廖宗元以力籌防守嚴催富戶捐輸致被紳富張
存浩等誣毆殺斃親兵十二名旋復與賊巷戰捐
軀城亡與亡實屬大節凜然深堪嘉憫廖宗元著
照知府例從優議卹並於紹興府城建立專祠以
彰忠盡其挾忿誣捏糾衆妄殺之紳士張存浩等
並著左宗棠於克復紹興府城後嚴拏到案盡法

懲治以儆兇頑